



Cynhyrchwyd yr hysbysiad hwn ar ran:
AQA, City & Guilds, CCEA, OCR, Pearson a CBAC
Gwybodaeth i Ymgeiswyr
Cymwysterau TAG, TLM a Phroject - Asesiadau Gwaith Cwrs

Mae'r daflen hon yn dweud wrthy ch am rai pethau y dylech, ac na ddylech, eu gwneud wrth gwblhau gwaith cwrs.

Cyn i chi gyflwyno unrhyw waith cwrs i'w farcio, gofynnir i chi lofnodi datganiad dilysu'n cadarnhau eich bod wedi darllen a dilyn y rheoliadau hyn.

Os nad ydych yn deall unrhyw beth, **rhaid** i chi ofyn i'ch athro neu ddarlithydd.

Mae gwaith cwrs yn rhoi cyfle i chi wneud rhywfaint o ymchwil annibynnol ar destun. Bydd yr ymchwil a wneir gennych yn cynnwys edrych am wybodaeth mewn ffynonellau cyhoeddus fel gwrslyfrau, gwyddoniaduron, cyfeirlyfrau, teledu, radio ac ar y rhyngwyd.

Mae defnyddio gwybodaeth o ffynonellau cyhoeddus (gan gynnwys y rhyngwyd) fel sail ar gyfer eich gwaith cwrs yn ffordd ddelfrydol o ddangos eich gwybodaeth a dealltwriaeth o bwnc, ond mae'n rhaid i chi gymryd gofal sut y byddwch yn defnyddio'r deunydd hwn – ni chewch ei gopïo a'i hawlio fel eich gwaith eich hun.

Mae'r rheoliadau'n nodi:

"rhaid mai eich gwaith eich hun yn unig yw'r gwaith a gyflwynwch i'w asesu";

"ni ddylech gopïo gan unrhyw un arall na chaniatáu i ymgeisydd arall gopïo gennych chi".

Os byddwch yn defnyddio'r un geiriad â ffynhonnell gyhoeddus, rhaid i chi roi dyfynodau o gwmpas y darn a nodi o ble y daeth. Gelwir hyn yn "cyfeirio". Rhaid i chi wneud yn siŵr eich bod yn rhoi cyfeiriadau manwl ar gyfer popeth yn eich gwaith nad yw yn eich geiriau eich hun. Dylai cyfeiriad o lyfr sydd wedi'i argraffu neu gyfeirlyfr ddangos enw'r awdur, y flwyddyn gyhoeddi a rhif y dudalen, er enghraifft: (Morrison, 2000, tud 29.)

Yn achos deunydd a gymerir o'r rhyngwyd, rhaid i'ch cyfeiriad ddangos dyddiad llwytho'r deunydd i lawr a rhaid i chi ddangos yr union dudalen we, nid y peiriant chwilio a ddefnyddiwyd i ddod o hyd iddi. Gellir copïo hyn o'r llinell cyfeiriad, er enghraifft:

(<http://www.bbc.co.uk/schools/16/sosteacher/history/49766.shtml>), llwythwyd i lawr 5 Chwefror 2017.

Rhaid i chi hefyd gynnwys llyfryddiaeth ar ddiwedd eich gwaith, sy'n rhestru manylion llawn y cyhoeddiadau rydych wedi'u defnyddio ar gyfer ymchwilio eich project, hyd yn oed os nad oes cyfeiriad uniongyrchol atyn nhw, er enghraifft:

Morrison, A (2000) "Mary, Queen of Scots", London: Weston Press.

Os byddwch yn copïo geiriau neu syniadau pobl eraill ac nad ydych yn dangos eich ffynonellau mewn cyfeiriadau a llyfryddiaeth, bydd hyn yn cael ei ystyried yn dwyllo.

Paratoi eich gwaith cwrs – arfer dda

Os byddwch yn derbyn cymorth ac arweiniad gan unrhyw un heblaw eich athro/athrawes, **rhaid** i chi ddweud wrth eich athro/athrawes a bydd yntau/hithau wedyn yn cofnodi natur y cymorth a roddwyd i chi.

Gall eich rhiant / gofalwr rhoi mynediad i chi i ddeunydd adnoddau a thrafod eich gwaith cwrs gyda chi. Fodd bynnag, rhaid iddynt beidio â rhoi cyngor uniongyrchol i chi ar yr hyn y dylid a ni ddylid ei gynnwys.

Os oeddech yn gweithio fel rhan o grŵp ar aseiniad, er enghraifft, wrth ymgymryd ag ymchwil maes, rhaid i bob un ohonoch ysgrifennu eich cyfrif eich hun o'r aseiniad. Hyd yn oed os yw'r data sydd gennych yr un peth, dylai'r disgrifiad o sut y cafwyd y data hwnnw a'r casgliadau y dewch iddynt fod yn eich geiriau eich hun.

Rhaid i chi gwrdd â'r dyddiadau cau y bydd eich athro/athrawes yn eu rhoi i chi. Cofiwch - mae eich athrawon yno i'ch arwain a'ch cynorthwyo. Er nad ydyn nhw'n gallu rhoi cymorth uniongyrchol i chi, gallan nhw helpu i ddatrys unrhyw broblemau cyn y bydd pethau'n mynd yn rhy hwyr.

Cymerwch ofal o'ch gwaith a'i gadw'n ddiogel. Peidiwch â'i adael o gwmpas lle bydd eich cyd-fyfyrwyr yn gallu dod o hyd iddo. Rhaid i chi gadw eich gwaith cwrs yn ddiogel ac yn gyfrinachol bob amser wrth ei baratoi; peidiwch â'i rannu â'ch cyd-fyfyrwyr. Os byddwch yn ei gadw ar rwydwaith cyfrifiadur, cadwch eich cyfrinair yn ddiogel. Casglwch yr holl gopiâu o'r argraffydd a dinistriwch y rhai nad oes eu hangen arnoch mwyach.

Peidiwch â chael eich temptio i ddefnyddio traethodau o gronfeydd traethawd ar-lein – mae hyn yn dwyllo. Gall offer electronig y mae'r cyrff dyfarnu'n ei ddefnyddio ganfod y math yma o gopïo.

Rhaid i chi beidio ag ysgrifennu deunydd amhriodol, sarhaus neu anwedus.

Llên-ladrad

Llên-ladrad yw cymryd geiriau, barn neu syniadau pobl eraill a cheisio honni mai eich rhai chi ydyn nhw. **Mae'n ffurf o dwyllo ac mae'n ddifrifol iawn.**

Peidiwch â meddwl na fyddwch yn cael eich dal. Mae llawer o ffyrdd o ganfod llên-ladrad.

- Gall marcwyr weld newid yn yr arddull ysgrifennu a'r defnydd o iaith;
- Mae marcwyr yn arbenigwyr pwnc hynod brofiadol sy'n gyfarwydd iawn â gwaith ar y testun dan sylw – gallant fod wedi darllen y ffynhonnell rydych yn ei ddefnyddio (neu hyd yn oed wedi marcio'r traethawd rydych wedi copïo ohono!);
- Gellir defnyddio peiriannau chwilio ar y rhyngwrdd a meddalwedd cyfrifiadurol arbenigol i gysylltu ymadroddion neu ddarnau o destun â'r ffynonellau gwreiddiol ac i ganfod newidiadau yng ngramadeg ac arddull yr ysgrifennu neu'r atalnodi.

Cosbau am dorri'r rheolau

Os bydd eich gwaith yn cael ei gyflwyno a'r ffaith eich bod chi wedi torri'r rheolau yn cael ei ganfod, byddwch yn cael eich cosbi mewn un o'r ffyrdd canlynol:

- byddwch yn cael sero marciau am y darn o waith;
- byddwch yn cael eich diarddel o'r uned honno am y gyfres arholiadau honno;
- byddwch yn cael eich diarddel o'r pwnc cyfan am y gyfres arholiadau honno;
- byddwch yn cael eich diarddel o bob pwnc a'ch gwahardd rhag cofrestru eto am gyfnod o amser.

Bydd eich corff dyfarnu'n penderfynu pa gosb sy'n briodol.

COFIWCH – EICH CYMHWYSTER CHI YDYW FELLY EICH GWAITH CHI DDYLAI FOD.